

Memoria **xustificativa** dun **convenio** de colaboración entre a Consellería de Presidencia, Xustiza e Deportes e a **Mancomunidade Intermunicipal Voluntaria do Ribeiro** para a execución do proxecto denominado **Melloras medioambientais na aula CEMIT da Mancomunidade do Ribeiro**

1. Departamento que tramita o convenio

A Consellería de Presidencia, Xustiza e Deportes é o departamento da Xunta de Galicia ao cal lle corresponde a elaboración, proposta e execución da política do Goberno galego en materia de Administración local, de conformidade co previsto no Decreto 136/2024, de 20 de maio, polo que se establece a estrutura orgánica da Consellería de Presidencia, Xustiza e Deportes (DOG núm. 101, do 27 de maio).

Dentro deste departamento, as competencias en materia de Administración local están atribuídas á Dirección Xeral de Administración Local. A este centro directivo correspóndelle, en particular, o fomento das liñas de colaboración coas entidades locais galegas no referente á convocatoria e execución das subvencións a elas destinadas.

2. Antecedentes

A Xunta de Galicia, a través da Consellería de Presidencia, Xustiza e Deportes, ten previsto asinar co Mancomunidade Intermunicipal Voluntaria do Ribeiro un convenio para a execución do proxecto denominado Melloras medioambientais na aula CEMIT da Mancomunidade do Ribeiro.

Segundo dispoñen os artigos 44 da Lei 7/1985, do 2 de abril, reguladora das bases do réxime local e 135 da LALGA, os municipios da Comunidade Autónoma de Galicia teñen dereito de asociarse en mancomunidades para a execución ou prestación en común de obras, servizos e actividades da súa competencia

A Mancomunidade Intermunicipal de Municipios do Ribeiro está integrada polos municipios de Arnoia, Beade, Cenlle, Cortegada e Leiro, estes municipios asociáronse para a prestación en común, entre outros, do servizo de promoción, nos respectivos termos municipais, da participación dos cidadáns no usos eficiente das tecnoloxías da información e as comunicacións para cuxa prestación dispón dun aula CEMIT, integrada na rede de Centros para a Modernización e a Inclusión Tecnolóxica de Galicia, iniciativa posta en marcha pola Axencia para a Modernización Tecnolóxica de Galicia (Amtega) da Xunta de Galicia, que actualmente forma parte da Estratexia Galicia dixital 2030, coa misión de conseguir unha sociedade máis autónoma dixitalmente que non deixe a ninguén atrás.

A aula CEMIT da Mancomunidade Intermunicipal Voluntaria do Ribeiro constitúe un espazo de referencia no eido da formación dixital e da alfabetización tecnolóxica da Comarca, prestando un servizo esencial para a cidadanía, as empresas e as entidades sociais do territorio; contribuído coa súa actividade decisivamente á redución da fenda dixital e á promoción da sociedade da información e do coñecemento do medio rural.



Pola súa banda, a Comunidade Autónoma de Galicia ten como obxectivo o desenvolvemento equilibrado do territorio galego, do medio rural e do urbano, do interior e da faixa costeira, que permita o progreso económico da totalidade do territorio e que a cidadanía galega teña unhas óptimas condicións de vida, con independencia do seu lugar de residencia, potenciando e apoiando a prestación de servizos por parte dos nosos mancomunidades que son a Administración máis próxima aos administrados.

O obxectivo común é conseguir ou mellorar o funcionamento dos servizos e das infraestruturas locais, de forma que as entidades locais poidan prestar servizos de calidade á veciñanza con independencia do seu lugar de residencia, coa finalidade de garantir a calidade ambiental, previr e mitigar os efectos adversos sobre o ambiente ou atender ás emerxencias

O artigo 25.5 da Lei 8/2009, do 22 de decembro, pola que se regula o aproveitamento eólico en Galicia e se crean o canon eólico e o Fondo de Compensación Ambiental dispón que a distribución anual do Fondo regularase mediante orde ditada pola consellería competente en materia de réxime local, na que tamén se establecerán os criterios de repartición, os entes locais beneficiarios e as actuacións ás que se destinará a parte do fondo que non estiver destinada ás entidades cuxo termo municipal se atope dentro da poligonal de delimitación dun parque eólico ou resulten afectadas polas correspondentes instalacións de conexión.

Para tal fin, mediante a Orde do 23 de xaneiro de 2025 reguláronse os criterios de repartición do Fondo de Compensación Ambiental para o ano 2025 e as actuacións ás que se destina, aplicándose parte do Fondo a actuacións específicas de protección do ambiente, é dicir, aquelas que teñen por obxecto a conservación da biodiversidade, o coñecemento e utilización recreativa e didáctica dos recursos naturais e máis a recuperación do medio natural degradado ou contaminado, incluídas aquelas que teñen por obxecto a prevención, extinción e xestión de situacións de sinistro ou de risco (artigo 2.1.c).

Desde o punto de vista orzamentario, no proxecto 2015 00168 existe un saldo de crédito axeitado e suficiente para a súa aplicación eficaz na colaboración coas entidades locais de Galicia apoiando aquelas actuacións de creación e/ou mellora de infraestruturas e equipamentos para a prestación de servizos municipais que teñan como finalidade a realización de actuacións específicas de protección do ambiente.

3. Finalidade

Para os efectos sinalados, tense previsto formalizar ca Mancomunidade Intermunicipal Voluntaria do Ribeiro instrumento convencional ao que se refire esta memoria, por un período de vixencia que abrangue desde o día da súa sinatura ata o 1 de decembro de 2025.

4. Obxecto do convenio

O obxecto do presente convenio é fixar as liñas de colaboración entre a Consellería de Presidencia, Xustiza e Deportes e a Mancomunidade Intermunicipal Voluntaria do Ribeiro para a execución do proxecto denominado Melloras medioambientais na aula CEMIT da Mancomunidade do Ribeiro .



5. Fundamentos do convenio

A Mancomunidade Intermunicipal Voluntaria do Ribeiro manifestou a necesidade extraordinaria e urxente de asistencia por parte da Consellería de Presidencia, Xustiza e Deportes para acometer o proxecto denominado melloras medioambientais na aula CEMIT da Mancomunidade do Ribeiro, este proxecto ten por obxecto a mellora da eficiencia enerxética da envolvente do edificio, co illamento de cuberta e fachada, mellora da iluminación e climatización interior, do saneamento e rede de sumidoiros.

O pasado mes de maio produciuse unha inundación nas instalacións da devandita aula por mor dos episodio meteorolóxicos que afectaron á infraestrutura provocando importantes danos materiais na mesma e nos seus equipamentos, danos que afectan a salubridade das instalacións e que motivaron o peche da aula e a paralización da súa actividade, accións formativas e servizos dixitais que se viñan prestando sen que existan na comarca alternativas similares que permitan, nestes momentos, a continuidade destes servizos esenciais no eido rural.

As inundacións ocasionaron o colapso do sistema de saneamento afectando as instalacións eléctricas e de iluminación así como á envolvente do edificio e os seus parámetros verticais, polo que nestes momentos é imprescindible actuar de xeito inmediato e urxente evitando a degradación ambiental coa reparación da rede de saneamento e sumidoiros e substituíndo os elementos danados por outros con mellores prestacións de illamento térmico e eficiencia enerxética, executando as actuacións previstas no proxecto obxecto deste convenio.

A necesidade da colaboración solicitada á Consellería acentúase pola confluencia doutros factores. Por unha banda, na actualidade non hai ningunha convocatoria en concorrencia á cal se poida acoller este proxecto nin se prevé nas próximas datas.

A actuación proposta ten, polo tanto, carácter urxente, correctivo e preventivo, e ten coma obxectivos:

- Eliminar os riscos ambientais e sanitarios, mediante a instalación de sistemas de impulsión con bombas, arquetas estancas, colectores de polietileno e elementos de control eléctrico que eviten novos desbordamentos.
- Reparar os danos construtivos ocasionados polas inundacións fecais, substituíndo solo técnico, paramentos, carpintería, portas e falsos teitos por materiais resistentes a humidade, de alta durabilidade e baixo impacto ambiental.
- Reducir a exposición a contaminantes interiores, especialmente aqueles asociados á presenza de gas radón, mediante o emprego de sistemas de solo con núcleo cementoso, cámaras ventiladas e cerre perimetral eficiente.

Por outra banda, a falta de recursos desta mancomunidade para poder acometer as devanditas actuacións, nun marco orzamentario restritivo, de austeridade e control do gasto público e necesariamente estable por imperativo legal para as entidades que integran a Administración local, configura un contexto do cal se derivan, entre outras consecuencias, a imposibilidade para o Mancomunidade Intermunicipal Voluntaria do Ribeiro de afrontar en solitario os compromisos económicos que a indispensable execución das actuacións obxecto de subvención, representan para a Facenda local.



Así pois, este convenio de colaboración responde ao interese público e social que representa a acción de fomento da Consellería de Presidencia, Xustiza e Deportes respecto da execución dunhas actuacións imprescindibles para o normal funcionamento da entidade local, que lle permitan exercer as competencias e prestar os servizos que a normativa básica en materia de réxime local lles atribúe aos concellos integrantes, como Administración máis próxima aos administrados; así mesmo, correspóndese con actuacións financiáveis de conformidade cos criterios e obxectivos do Fondo de Compensación Ambiental e co proxecto orzamentario 2015 00168 Outras actuacións específicas de protección do ambiente.

A conxuntura descrita, a necesidade extraordinaria de asistencia manifestada pola Mancomunidade Intermunicipal Voluntaria do Ribeiro e o obxectivo da actuación, así como a existencia de crédito axeitado e suficiente para a súa aplicación eficaz no restablecemento dos servizos municipais sobre os cales se actuará a través do convenio que se pretende subscribir, unido ao cumprimento dos obxectivos do Fondo de Compensación Ambiental, acreditan a existencia de razóns de interese público que xustifican recorrer ao procedemento excepcional de concesión directa dunha subvención a favor do Mancomunidade Intermunicipal Voluntaria do Ribeiro.

6. Aplicación orzamentaria e importe

Para dar cumprimento aos obxectivos deste convenio, a Consellería de Presidencia, Xustiza e Deportes, a través da Dirección Xeral de Administración Local, achegará a cantidade máxima de CORENTA E OITO MIL DOUSCENTOS NOVE EUROS CON SETENTA E CATRO CÉNTIMOS (48.209,74€) con cargo á aplicación orzamentaria 05.04.141A.761.1 (C.P. 2015 00168) dos orzamentos xerais da Comunidade Autónoma para o ano 2025, na que existe crédito adecuado e suficiente. Este importe representa o 100% do orzamento total do proxecto que constitúe o obxecto deste convenio.

Polo exposto, considérase xustificada a utilización do instrumento do convenio para articular as actuacións de referencia, quedando o dito convenio fóra do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, con independencia de que, ao abeiro do previsto nos artigo 4 da devandita norma, lle sexan de aplicación os principios desta lei para resolver as dúbidas e lagoas que se poidan presentar.

Santiago de Compostela, na data da sinatura electrónica
A directora xeral de Administración Local

Natalia Prieto Viso
(*documento asinado electronicamente*)

